

Alf Nußnagger

25 jähriges Jubiläum
1900 — 1925



„D'Bubikepf“

1.

Es sinn jetz finfezwanzig Jahr,
Daß mir Eich Schnitzler singe vor;
Und trotzdem halte mir no Schritt
Au mit der neie Zitt.
Denn wie-Si do jo selber gsehn,
Mir mit der neiste Mode gehn;
Mir schwinge-n-alli, statt de Zepf,
Moderni Bubikepf.

2.

Mit Eleganz und mit Elan
Het 's letzt Jahr uff der Foxtrott-Bahn
E junge Schnufer unschiniert
Die Backfisch uffegfiehrt.
Und uff der Fahrt, es isch unghir,
Fange die Pflimli alli Fir;
Schuld isch an all dem Liebesschmerz
Das Foxtrottschangi-Herz.

3.

E Fescht isch gsi ganz bsunderer Art
Fir d' Großret sälli Luftschiffahrt;
Ganz briederlig, was wotsch no meh,
Hesch do si kenne gseh.
E beesi Gosche het zwor gsait,
Ganz zynisch und us voller Fraid:
Si sinn no nie, so alt i bi,
Uff so'nre Hechi setzt.

4.

Uff unsrer scheene Wettstaibrugg
Goht um e ganz e beese Spugg;
Kontrolle-n-iebt dert Schritt fir Schritt
E „Schugger“ bi de Litt.
Er paßt sogar no uff bim Hund,
Wenn ebbe-n-im e Wirstli kunnt,
Ob-er d' Verordnig nit verletzt
Und's nur bim „Rechtsgoh“ setzt.

5.

E Horburg-Schwizer macht e Gschrei:
Mit dere Barbaraschießerei,
Do kennt-me doch so nodino
E mol uff's Gellert go.
Es sait do druff der Dalbenees,
Dä Vorschlag isch ganz schenerös;
Mer sinn schints doch no, er erklärt,
E paar Schiß Pulver wert.

6.

In Saffre, Birsig, nai wie guet,
Me 's Teliphon umlaite tuet;
Die Wort, die hänn scho johrelang
E-n-enge Zämmehang.
Denn menge-n-in der Saffre scho
Bim Zumftfraß het e Katz biko;
Het hinte-n-use denn verschmitzt
Si schnell in Birsig gfitzt.

7.

E neui Kranket, wo umlaufft,
Het d' Medizin mit „Gluggsi“ taufft;
Zum Gligg regiert si nit so hart,
Si isch nur lichter Art.
Doch ganz e bsunders schwere Fall
Wird gmeldet uns vom Großbrotssaal:
Dert heb e Welt-Ma, o wie gfuggst,
Drei Stund an aimfurt gluggst.

8.

's hätt interessiert gwis Alt und Jung
Dä Globus-Mordis-Todessprung;
Doch will Matratze lege mießt,
's Verbott me pletzlich bschließt.
's heißt, wenn der Bebbi tät die Fee
Uff der Matratze liege seh.
So wurd-er sicher ganz nervös
Und kriegti „Muni bö“.

9.

E Blueme-Korso het-me gmacht
In Basel, s'isch e wohri Pracht;
Me heb emol, so het-me ghert',
Au d' Großstadt usekehrt.
Und no derzue, wie mordsfidel
Me holt im Zolli 's grescht Kamel;
Isch fir d'Regierig echt das Vieh
Am Zug vertrette gsi?